



www.BibleForChildren.org




Juan 14



Usaquin catancëxun ca ësaquinribi Jesusan aín
'unánmicë unicama cacëxa: —Masá nuituaxma ca 'ican.
Nucën Papa Diosmi camina catamëti 'ain. Nucën Papa
Diosmi catamëti ca 'ëmiribi catamët. 'Ën Papan 'icënu
ca anu 'iti 'itsa 'icën.



Anu 'iti 'aíma 'ain cana, anu 'iti ca 'aíma 'icë quixun
mitsu catsían. Usa 'ain cana anumi 'icánti a mitsu
mëníoxuni cuanin. Mëníoxunbëtsini cana anumi 'ëbë
'inun mitsu bitsi utëcënuxun 'ain, 'ëx anu 'icë anumi
mitsux 'ëbë 'inun.



'Ëx Juan 'aish cana mitsúxmi 'icësaribiti Jesúsnan
'aish mitsun xucënsa 'ain. Mitsúxmi 'icësaribiti
cana Jesucristonan cupí, unin 'atimocë

'aíshbi asérabi Nucën
Papa Diosan uni 'ain.



Mitsu 'acēsaribi oquian an cushiocēxun cana uisa
ñu cara 'icēbēbi bēnēquin ami catamēti ěniman.
Usa 'ixun Nucēn Papa Diosan bana


ñuixuanan, Jesús ñui
quicē banaribi uni



ñuixuncē cupí cana
Patmos cacē nasínu
sipuacēsa 'inun unin
ěncē 'ain.



Cacëxunshi Nucën Papa Diosan Bëru Ñunshin
Upitan 'imicëxun cana 'uxúnmabi namácësa oquin
naicamë'ëonua anu tsóti upíira upí anu 'Apuira tsóti,
a isan. Isanan cana axa anu tsócë Nucën Papa
Dios aribi isan.



Usai banaia cuanan cana Nucën Papa Diosan unio
ñucama, naínu 'icë ñucama, 'imainun menu 'icë 'imainun
bacanu 'icë, anua bamacë unicama
'icë anu 'icë unicama, acamaxa
munuma banai ësai quia cuan: Ax
anu tsócë Nucën Papa Dios, a
'imainun Carnero 'icësaribitia
unin 'ucha cupí
bama, aribi
ca camaxunbi
cuëënquin
axribia
cuëënun
rabiti
'icën.



Rabianan ca —asábi ca —quixun caquin
rabiquin an cacë bana cuati 'icën.
Ax cushiira 'aísha bëtsi 'apusama
'icë ca camaxunbi xënibua 'aínbi
a rabiti 'icën. Cuëënquin ca
axribia cuëënnun rabiti 'icën.




Isanan cana Jerusalén ëma ió, upíira upí, Nucën Papa Diosan nētënuaxa ubutia isan. 'Ën iscëx ca upíira upí 'iaxa, xanúxa bërí bënunux upiti mëníocacësaribi.

Isanan cana naínuaxa munuma ësai qui banaia cuan:
—Camina isti 'ain, anua uni bucucë, anu ca Nucën Papa Dios bërí 'ia.

Anu aín unicama 'icë anu ca Nucën Papa Dios 'iti 'icën.


A unicamax ca asérabi aín uni 'iti 'icën. Ax aín Dios 'aish ca aín unicamabë 'iti 'icën.



Usaquin 'ë ismitancëxun ca angelnën anua Nucën
Papa Dios 'imainun Carnero 'icësaribitia unin 'ucha
cupí bama, ax 'icë, anuaxa baca aín 'unpax bëxnan
bëxnánquicë chiquitia 'ë ismiaxa.



A ëma ca Nucën Papa Diosanbi pëcaia. Carnero
'icësaribitia unin 'ucha cupí bama, anribi ca a ëma
pëcaia. Usa 'ain ca baribëtan 'uxën a ëma pëcaima.



Usa 'ain ca anu ñu 'aisama 'itima 'icën, ui unix cara
'aisama ñu 'acë 'icë 'imainun ui unix cara cëmëia, usa
unix ca anu 'itima 'icën. Ui
unicamax cara Nucën Papa
Diosan nëtënu 'itioquin aín
anë Carnero 'icësaribitia
unin 'ucha cupí bama,
aín quiricanu cuënëo
'icë, acamax cuni ca
anu 'iti 'icën.




An ca aín unicama aín bëunan
mëscutia ini masá nuitutiabi
nëtëmiti 'icën, aín bëun
tërénquin. A unicamax ca
bamatëcëntima 'icën, usai 'ianan
ca rarumatëcëntima 'icën,
'ianan ca intëcëntima 'icën,
acaman ca paë tantëcëntima
'icën. Bëráma usai 'iá 'aíshbi ca
usai 'itëcëntima 'icën.



Usa 'ain ca Nucën Papa Diosan uisoquin cara 'ati 'icë
usoquin 'ati ñu anu 'aíma 'iti 'icën. Anu ca Nucën Papa
Dios 'imainun Carnero 'icësaribitia unin 'ucha cupí
bama, ax 'Apu 'iti 'icën. Usa 'icë ca anuxun aín
unicaman a rabiti 'icën.


Rabianan ca anuax
abë isananti 'icën.

Usa 'aish ca Nucën
Papa Diosan anë
atun bëmánanu
cuënëocë
'iti 'icën.




Usaquinribi isanan cana axa bama unicama,
uni cushibu 'imainun uni cushimabu, acamaxa
baísquitancëx anua Nucën Papa Dios 'icë aín
bëmánon sëtécë isan. A unicamaxa sëtémainun
ca quirica achúshi, anu ui unicamax cara
Nucën Papa Diosbë 'iti 'icë quixun aín
anë cuënëocë, ax bacacë 'iaxa.


A isanan cana bëtsi
quiricacamaribi isan.
A quiricacamanu ca
añu ñucama cara
unicaman 'axa quixun
cuënëocë 'iaxa.




A quiricacama isquin ca Nucën Papa Diosan unin cara
upí ñu 'axa, cara upíma ñu 'axa quixun isaxa. Isun ca
aín ñu 'acësabi oquin mëníonan an ñu upí 'acë uni upí
'imainuan an ñu upíma 'acë unicama tëmëranun 'imiaxa.
Usaquin 'á 'ain ca bamati 'imainun anua uni bamacë 'icë
ax 'ianëmë'ëosa manë tsi rëquirucë anu
nicë 'iaxa. 'Imainun ca ui unicamax
cara Nucën Papa Diosan
nëtënu 'inun aín anë
cuënëoma 'icë,
acamaxribi anuax
bamatëcëncësa
'aish chiquítimoi
'inux, 'ianëmë'ëosa
manë tsinu nicë 'iaxa.



Usoquin caia ca Carnero 'icēsaribitia unin 'ucha cupí
bama, Cristo, amia ax catamēcē unicamabētan Nucēn
Papa Diosan Bēru Ñunshin Upitan —bēnētishi ca ut
—quixun a caia. An atun bana cuacē unicamanribi ca
—bēnētishi ca utēcēn —quixun a cati 'icēn.



Shimaia uni 'unpax 'acatsi bënëcësa usaribitia ax
Jesuscristonan 'icatsi bënëcë uni, an ca ami
catamëquin Jesucristo —ëx cana minan 'iisa tani
—quixun cati 'icën. Usaía 'ia ca Cristonën ainan
'imianan xë nibua 'aínbi abë 'inun 'imiti 'icën, cupímashi.



Camabi uni asérabi nuibaquin ca
Nucën Papa Diosan aín Bëchicë
achúshi ënë menu xuacëxa, uicamax
cara ami catamëtia axa
nëtétimoi abë 'inun.



Romanos 3:23 Camabi unix ca Nucën Papa Diosan iscëx
' uchañu ' icën. Upíira ' inuan Nucën Papa Diosan unio
' aishbi ca usama ' icën.

Romanos 6:23 Aín ' ucha cupí ca uni iétimoi bamati ' icën.
Usa ' aínbi ca axa aín ' ucha térénun Nucën ' Ibu
Jesucristomi catamécë unicama a abë xenibua ' aínbi
' inun Nucën Papa Diosan iémia.

Hebreos 9:27 Ënë nētēnu ' icë camabi unix ca
achúshitishi bamati ' icën. Usa ' icë ca aín ñu ' acëcama
' unánquin Nucën Papa Diosan uicamax cara aín nētēnu
abë ' iti ' icë quixun canan uicamax cara anu abë ' itima
' icë quixun cati ' icën.



Efesios 2:8,9 Nuibaquin ca asérabi cuëenquin mitsúxmi
Cristomi catamëti cupíshi mitsu ainan 'inun iémiaxa.
Mitsúnmi ñu upí 'acë cupíma ca Jesucristo bama cupíshi
Nucën Papa Diosan ax cuëenquinshi mitsu ainan 'inun
iémiaxa. An ca an ñu upí 'acë cupí ainan 'inun uni iémima.
Usa 'ain ca uinu 'icë unínbi — 'ën upí ñu 'acë cupí cana
iëa —quixun rabíquin sinántima 'icën.

Romanos 10:9,10 A bana ca ësai quia: —Jesús ca 'ën
'Ibu 'icë —quianan bamacëbi ca Nucën Papa Diosan a
baísquimiacëxa quixun min nuitunën sinania ca Nucën
Papa Diosan ainan 'inun mi iémiti 'icën. Nun nuitu mëu,
asérabi ca nun 'ucha térénti 'icë quixun sinani
Jesucristomi catamëtia, ca Nucën Papa Diosan nun 'ucha
téréntinquin nu upí isia. Usoquin an iscéxnu —Jesucristo
ax ca asérabi 'ën 'Ibu 'icë —quia ca Nucën Papa
Diosan ainan 'inun nu iémia.



Juan 3:16,17 Camabi uni asérabi nuibaquin ca Nucën Papa Diosan aín Bëchicë achúshi ënë menu xuacëxa, uicamax cara ami catamëtia axa nëtétimoi abë 'inun. Nucën Papa Diosan ca aín Bëchicë an ënë menu 'icë unicama aín 'ucha cupí 'uchonun xuáma 'icën. Ama, ënë menu 'icë unicama aín 'ucha tërénquin ainan 'inun iéminun quixun ca xuacëxa.

1 Juan 5:11-13 Nucën Papa Dios ca quiacëxa, aín Bëchicëmi catamëcë cupí cananuna an 'imicëx ainan 'aish xënibua 'aínbi abë 'iti 'ai quiax. Uinu 'icë unix cara Nucën Papa Diosan Bëchicënan 'icë, a unix ca usaribiti nëtétimoi Nucën Papa Diosbë 'ia. Usa 'aínbi ca uinu 'icë unix cara aín Bëchicënanma 'icë, a unix xënibua 'aínbi Nucën Papa Diosbë 'ima. Aín Bëchicëmi catamëcë 'aish camina ainan 'aish Nucën Papa Diosbë xënibua 'aínbi 'iti 'ai quixunmi 'unánun cana ënë ñucama mitsu cuënëoxunin.



Juan 14; 2 Corintios 5; Apocalipsis 4, 21, 22

Storyline by: Edward D. Hughes

Illustrated by: Lazarus
and Alastair Paterson

Adapted by: Sarah S.

Cashibo-Cacataib Bible (cbr) © 1978, 1995, 2008, 2022
Wycliffe Bible Translators, Inc. All rights reserved.

<https://live.bible.is/bible/CBRWBT/MAT/1>

©2024 Bible for Children, Inc.

www.M1914.org

www.bibleforchildren.org

